

觀化集叙

甲寅山元日吉水念菴羅洪先撰

或問於余曰孔老其旨同異余曰至道之
在天下如水之在地中江淮河漢濟漯渭
汭支流不同朝宗一也頃讀薛吏部君采
註老氏書因得二聖殊塗同歸之義及觀
高子業所爲序至引王祭酒曹京兆之言
以爲孔老意同而言異又謂二聖人之言
道也猶中國之名天也彼匈奴則謂之撐
犁矣其言豈有二哉至矣名言諸子之於

道也夫自哲人沒而精義微大雅亡而玄響絕神游有無之極流通元始之妙遂泯泯而無傳焉余不敏抱拙守陋窮窓散帙大率瀛閩之餘訓加以弱質早衰研窮多廢乃所願學而力有不逮旁咨若人皆方士之幻談神僊之粗跡非性命之真機神聖之上傳出詞且躓又安能被諸聲詩副之通邑大都其人哉惟自放逐以來游寓江海江海之人皆稱桂林有名賢曰雲僊者籍通朱邸心託綠雲早涉藝涯長登仙

苑側身西望湘水深矣張衡所思予今同調豈非以未見君子憂心忡忡固如是哉友人劉節推龍山爲余言雲僊乃清真君子也處黻冕之貴履素博服不知其身之寵辱有韋布積學者所不逮出其緒餘揚性靈序物則燁然春華粲然星爛諸不能徧觀他日宗人果齋太守寄余觀化集一帙乃雲僊所自著三復之餘颯颯乎古之遺音材碩而瑰弘思玄而締密建安陳思之儔非耶因嘆曰劉子之言可謂信而有

徵矣間命余為之言余竊以諸子孔老之
辨及所聞於劉子者推平樂府事平樂與
桂林接境又與雲僊雅相知識云

觀化集序

奉錄按粵刑部郎華亭太冲袁福徵撰

辛亥之歲

聖天子周恤庶民爰欽明罰命部使者分
馳諸省於是福徵有粵西之役比蒞境官
署言暇廼得晉縉紳先生學士大夫于庭
相與暢言敷議大都有雅致中多稱弄丸
公弄丸公者逃耳盛名未克言覲越翌日
造第請謁承諭升堂得見公為人瀟然玉
立抱嵇康之神姿發孫登之清嘯玄言妙

解灌飫芳膏神澤仙標照映元璧豈特昔
人之醉心抑且非夫之憎貌又明日乃得
公所著觀化集讀之始得公不言之意出
所聞之外者間謂予爲知言下命以序袁
福徵曰大化之流行於穹壤間也若一息
之運然自非至人何去何來蜉蝣於朝夕
蟪蛄於春秋爾倏爾忽曾何底止也耶古
昔神聖翰飛赤霄之表蟬蛻溘澌之外吸
日月之精華結雲霞之光兆先無始以肇
生后太素以運命夫唯猶龍嘆於宣尼大


雅贊於遷史固惠朗之天授寔元化之洞
觀惟我公生具清真之才系出
神明之胄屏鍾鼎而即素守關鍵而獨超
申以古光大師之傳了然卓爾遂入玄品
於是發爲聲詩俾幽而顯哀乎至言令人
發省福徵何斯而得與聞此哉昔王充作
論衡葵噫秘之不輕以示人由今觀化之
作視論衡又當何如耶弄丸公維靖名藩
海內皆稱爲雲僊弄丸則寓意云爾所著
別有詩集及佳繪墨傳於世

伏食初論

謂大制在天下而尚晦明一陶能作萬器而忘於善陶器之始乎一土能育萬金而往於斯土金之元乎元始其所以極乎元者尊巍至德得無上德悉備元母其唯幾哉世以審用成物苦鍊凡火尅去兩弦類以伏食不無遠爾譬使罔象而求之大不媒矣是謂掩鏡鑑窮究形則惑得無誚耶率以十四字以明則金爲體土尅水圓之功不生之生乃統天


觀化圖

淵夫見往人



象識瞻諸聖

道之器也
參伍而更
變則幾矣
應諸神明



倉庚志感候

觀類圖

尺蠖少真知

觀化集

西粵弄丸山人雲僊約佶著

門人洞泉子謝應奎校正

不較閒居以輜重無謂象罔爲心

上畏

神皇于九龍下戾

先君之克志惟吊影羣鷗荒其未央若
夫心誌善淵與誌善仁苟無自勵晞陽
不我是謂驅羊下阪得無類乎昔受吾
師以內外一致脫悟數言名曰觀化集

倉庚志感候

觀類圖

尺蠖少真知

觀化集

西粵弄丸山人雲僊約佶著

門人洞泉子謝應奎校正

不轂閒居以輜重無謂象罔爲心

上畏

神皇于九龍下戾

先君之克志惟吊影羣鷗荒其未央若
夫心誌善淵與誌善仁苟無自勵晞陽
不我是謂驅羊下阪得無類乎昔受吾
師以內外一致脫悟數言名曰觀化集

雖無干霄之狀博我同心者共歷太冥
以嗣希音 戊午仲春吉旦

吾觀洞淪化寂滅證無聲七十二輪虛分
介具相征萬彙刻節候推敷以媒并詰
剥自生殺太質無定名流光率良止出
入由所呈古之大聖教爲金惟昭明竭
世羣嗤嗤死生無復停

神哉古良器掩蔽生塵埃泰淵復且杳那
能造其媒累土蕒未及妄擬崔嵬臺期
當閱衆甫欲不欲相培瑤臺有玄鳳嫺

嫺空徘徊

含變而自極鬼神其無幾誠者維統紀率
性寧安違火一樹德門水二乃相希仲
尼道不遠人遠淪匡幾古來誠以化吾
道恒尊持

義叩丹砂理先明神德居金斤伏雜火媾
浴慎其初鼎設象天地外白黃包舉木
以女蝠秀水鎮彘相苴原元會有因訖
二兔間踈八石聽尊旨一匕以輕軀能
馴虎龍悅被褐豈狂夫

上閉襲常教介然無我求推演忘所紀玄
黃建始由神君佐金鼎德化施羣幽攀
髯雲路舉白日天墀遊赤舄感而徵萬
世其何儔

易以夫何思感而遂相須衆物寓以形形
數非殊途天地既委稅竭化難辭無大
運紀西方建德乃之樞端合清泠宰元
極混相圖聖人貴無身無身患何敷
碧華盈翡翠端望景雲生玄宮幽且默佇
思徒結盟赤女采其英拜月向新庚調

黃以間白復以見黃鍾三十以輳較妙
用在其空

道罔以關鍵不弊知常賓仰之徒疊疊大
制尊無隣世若貧采薪鑽燧以舉焚嚴
冬障擬敵斯力詎常溫探索無上極窮
爾太始旻所以測形位咄咄其誰陳

純以合大方聖人篤脩之易行擅其中神
而彌所持感發率未萌變應以夸毗吉
凶互挺盪十輝無定揆萬物以善覺人
道愧芻尼執古之所有以御今之疑

脫悟絕詩十首

天地先私用至公古來名教鮮難通當時
武帝樓西月法象空懸漢寢宮

聖人憂念在元元五賊求心不可援胡粉
造來妍悅澤邇來據按出多門

昏黷冥真據大荒始知危障起類網神君
息住胎元府金性如如見子陽

土鎮黃宮茁紫璫送歸白帝育玄英黃中
象白分胎母萬化都緣土釜生

子午分章戊巳門聽三違五序難婚若明

黃屋爲樞紐八石緣何不體尊

羣動彌淪詎大殊杳然元命啓徵符崑池
寶應緣非玉西海還探明月珠

真性原元語不繁始于無作本來天東風
一息先生覺大智何知污泥間

赤水波流子未央高懸臺第列宮商巽南
風動歸乾土紫萼花開遠寄將

南北東西序有徵鬼鬼相勝據相呈各緣
位界潛符兆金火安能一處生

紫冥波近海西頭金屋臺城壯且幽宇內

多方求泥質三花開謝幾經秋

六言自鑒四首

含育玄黃較約何能悟脫斯門垂象著明
天馬山中木食身尊

太昊三五至微萬古懸于終極周尼啓諸
大聖演翼天運繩則

教朴難于復古其如五岳閒身恭淵放歌
浴滌恒南赤鳳傳神

九華龍御丈人向昔苦心自責揚身遂歷
諸辰撒手拋離火宅

感寓古詩十四首用荅古光師

吾皇御九龍垂輝耀天闈元聲啓大雅萬
類晞朝暎詎無懷忠念臨郊耻孤豚習
息苟如此希聖其爲尊偷生羈萬物豈
不別寒溫

卓犖弄柔翰沉淪守一隅砥湍期滿腹韜
息在一枝鳥籠終習習鍛翮斗儲賈
生氣益振卞氏泣中途天風吹被褐長
日下郊墟

庖犧大聖人億萬同斯世會一含爾機有

無互相契嘉此未始前真淵不二計日
月駢化功輻輳具微細手持三株花西
池浴靈蒂其如未已言研幾究斯弊
南嶽有高臺菁菁采其莪阿阿託大陵清
霜亦何多碩彼玄盛時異夕委故科晨
風悲我襟高蔭息鳴珂逝水東北流無
復見回波從茲邈雞犬靈丘種玉禾

大儀彌幹運刪述眇代謝涼風振淳和流
火已隕夜靈景殊遷耗長物無騰駕岌
岌道如斯驕喪寧委舍吾志困潛淵玄

漠與俱化

崑崙碧玉樹嫋嫋凌滄洲側側置寰宇清
真逼素秋鸞鳳豈不儔迢遞趾潛修飲
湍振天柱絕粒栖霞丘飲宿當自持不
以徵無求

丘園有素業清風常在闕鏡湖多五雲照
耀區寰間鸞雛本清英飄颻羈塵頽丹
霞破海月湖光開遠山湖水且斟酌接
竿春風間惜哉渭川子日夕坐潺湲君
今把瑤草駕鶴未應還

堰水掩靈蟄水錮戾凡近德盛處深淵脩
文履含蘊奮迅不可量震機寧得禁鱸
鮪何鱖鱖掉尾亦逾分碩彼何遑遑豈
在一朝奮震卦

幽泉俯崑隅流波盪層沸汲此斟酌之太
元泝斯味沆瀣寔杳溟靡靡亦可既蒼
旻伏動機達人詎無諱鳳鳥來珣玕斯
道理涇渭所以不敢言薜衣良自貴
庭中有古松盤那千丈碧歲華托靈根柔
科玩精鬼風雨結晦暝神光護深僻異

苓晏春泉流膏長苔磧物碩寶厥真斯
才詎無策所劇障玄圃寥寥世相隔

崑崙碧玉樹嫋嫋類群芳清芬頤霞靄秀
雪明琳琅始達觀物化於邑其誰將朝
浥華頂色暮擬委嚴霜念茲瓊芳歇惜
哉孤廟堂空青徒鳥道江漢杳無梁願
佩雙錦羽碧海窮扶桑

秋風生沅湘瑟瑟縈悲愴女娥動中懷念
結青雲上龍御何麟麟捐珮殊俛仰澧
蘭冒孤英徒芳竟草莽萬古俯茲心迢

遙詣靈爽

以道寡期生掛劍良嶮巖世途側風波哲
人安可基東升若木枝赤日光顯熙長
嘯孔丘明玉筍超百罹

未裔耻孤生卓然啓前哲懷我三閭君同
門異幽轍騷經馳聖流圖議自昭烈勉
赤非存心名逾遭忌潔周鼎爨鷓鴣土
鷲焚美玦世故此捫心江萬徒自茁

鷓鴣賦

并序

余之竭來其朴小納若谷是以薄世物

之廣知聿一性也每臨粵阪振湘流盤
滌巨浪上引靈江南下蒼梧潭窪高寄
島嶼環出上有鷓鴣之立焉觀其資素
幽默含容自如視無轍迹之內憂純爾
太淵之孤宿嗟呼物尚以躁靜多方何
不以詘伸任物求身於屑屑哉賦曰

鵬徙兮南溟鷗征兮西紀廣役乎九萬
之勞御神乎變應之舉雖憑虛而逞肆
羈嗣時而後已能無處柔用晦有碧潭
之鳥焉忘舛錯遠煩嬰棲江芷避潮興

餞賓陽宛奮懷于忠懇窮秋索底抱月
於西坤動而浮玩于脩趾斂則納靜以
芻靈脫恩害于遠道吐受緹於無徵翼
江漢於順理固成命以厥齡吊文石之
翠影博霧露之相形馴衆禽之委下抗
愚育已矣哉或載或隳若唯若阿忘見
則明負靜則和持至篤之未兆守去泰
之以訛操潔身於四廣偉孤志於雲蘿
齟齬喈喈誌趣其多諂烏生之以調詠

恒將采事于長歌

觀化集叙

明嘉靖丁巳夏五吳郡鈞玄吏隱沈應魁撰

聞之太史公云儒學亦紂老子老子亦紂
儒學道不同不相爲謀余謂太史公非知
道者儒若孔子然且適周好問猶龍之嘆
神遇之矣性與天道子所罕述是以後代
無傳焉世微真儒寧不相紂哉夫盡性至
命易之道也性命天下之一本也生民同
得之非異物也聖人同傳之非異術也迷
其所同得故異見失其所同傳故異說古

者叙六家而謂之道家後世顧詆之曰異
端然道書云道之精以治身其緒餘以爲
國家土苴以治天下斯言質之儒胡弗同
也世直以道家爲養生耳余誠所未喻也
今方士之言養生者率支離於性命之外
世儒謾談知性知天而遺厥性命之實至
於羊質虎皮儒言市行聲利炎於中趨死
而不厭夏蟲疑水曷足訾哉余無暇縷數
軒轅神聖龍飛鼎湖古今盛闡亦異端邪
道書萬卷解者人殊倘非真傳魚目混珠

故以清淨解者未識磨磚作鏡之譏也以
調息解者未達空鑰水火之失也以心腎
解者未喻獨脩一物之訛也以男女解者
未悟生人生物之本也以砂汞解者未察
後天渣滓之繆也以日月精華解者未考
玄遠感通之譬也老子云吾言甚易知天
下莫能知蓋數傳數變舍本趣末簡易真
機入天秘密道之難聞也如此余少多瘞
嗜玩長生之術丹經子史遍讀靡遺罔所
適從中歲蘄嚮聖人之道覃思性命之微

夢感天人。懇受真訣。迺知昔之所嗜。第方
士之小術。而非性命之學也。復知先聖遺
經。惟導人盡性至命。而非異端之流也。此
可與高明好古者。道未易與流俗言矣。丙
辰冬。余承乏廣臬。咨訪名賢。獲覲雲僊。丰
神玉立。蓋忘藩至之貴。而崇道德之尊。神
蘊羣經。光撰斯集。其旨遠其詞文。信慕淮
南之冲舉。思八公之儔匹。而超然自悟者。
然。邈矣。深居偉見。聆余聲。歎信公所宗。古
光先生已參厥上乘。他時天假之緣。或能
脫烏於崑崙洞天。相將寥廓。否耶。必也是
所願也。遂率爾叙之。

觀化集終